



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: pressecretariat@samoa.ws

Press Release

1 Me 2008

1. Fesuaiga o Tau o le Suauu & Penisini

Ua faamaonia e le Kapeneta le fesuaiga o tau o suauu & penisini e pei ona faaalua i le pepa o faamatalaga sa taulimaina. O loo faaalua i le ata o loo i lalo le fesuaiga o tau o suauu ma penisini i le masina o Aperila ma Me 2008 i Samoa.

SUAUU	APERILA	ME	FESUIAIGA
PENISINI	287.1 sene/lita	293.8 sene/lita	6.7 sene/lita (2.3%)
TINO	303.4 sene/lita	326.4 sene/lita	23 sene/lita (7%)
KARASINI	283.6 sene/lita	307.2 sene/lita	23.6 sene.lita (7.7%)

O le penisini o le a siitia i le 6.7 sene i le lita mai le \$2.87 i le \$2.94, o le tiso e 23 sene i le lita o le a siitia ai mai le \$3.03 i le \$3.26 ma le karasini e 23.6 sene i le lita o le a siitia ai mai le \$2.84 i le \$3.07 mo le masina o Aperila 2008

Ua faamafua lenei siitaga ona o ni aafiaga i paipa suau'u i Nigeria, lea e gaosia ai le suau'u. E le gata i lea, a ona o le maualuga atu o le aofai o suauu manaomia nai lo suauu o loo gaosia, e pei ona faailoa mai e se alii suesue tau le tamaoaiga o le lalolagi.

O loo faailoa atu i le ata o loo i lalo le tau o le suauu i nisi o atunuu o le Pasefika ma o loo manino mai ai le maualalo o le tau o suauu i Samoa pe a fua i Niu Sila, Ausetalia ma Fiti.

	SAMOA	AUSETALIA		NIU SILA		FITI	
	SAT	AUD	SAT	NZD	SAT	FJD	SAT
PENISINI	\$2.94	\$1.47	\$3.50	\$1.92	\$3.80	\$2.10	\$3.59
TISO	\$3.26	\$1.70	\$4.05	\$1.57	\$3.11	\$1.82	\$3.11

2. Faaiuga i Misa a Aoga ma se Fofō.

I lana Fono o le Aso Lulu 30 Aperila 2008, na talanoaina ai e le Kapeneta le mataupu e faatatau i le fe'eseeseaiga i le va o fanau aoga ma faia ai lana faaiuga e faapea:

- Le taofia o soo se taaloga i va o Aoga uma a le Malo mo le tausaga atoa e afua atu i le taimi nei;
- Le faatonuina e le Kapeneta o le KVA Consultant latou te faia se suesuega i se faataatiaga o taiala talafeagai e faatautaia ai taaloga a aoga i Samoa ina ia le toe tupu mai ai ni vesiga i le va o fanau aoga;

- O le toe amatalia o taaloga ina ua tuanai le tapu ua faia e le Kapeneta o le a faalagolago lea i ni taiala fou e malu puipuia ai taaloga i le va o fanau aoga;
- Le tapunia o malae taalo uma a le Malo e le toe faaogaina e soo se Aoga mo le tausaga atoa lenesi; ma

Ua faatonuina foi le Ofisa Sili o Pulega Matagaluega o Aoga, Taaloga ma Aganuu ina ia faatino e le Matagaluega le faaiuga lenesi ma toe lipoti mai i le Kapeneta tualumaga o le suesuega ma nisi fuafuaga fou mo le lumanai.

3. Lipoti mo le:

- i. **Malaga mo le Faaaliga o Pisinisi Vaa/Meli Lau Pasese,**
- ii. **Feiloaiga ma le Kamupani Vaalele o le Air New Zealand,**
- iii. **Feiloaiga ma le Konesula a Samoa i Kalefonia.**

Ua faamaonia e le Kapeneta le lipoti o le Malaga a Sui o le Pulega o Tagata Tafafao Maimoa i le Faaliga o Pisinisi Vaa/Meli Lau Pasese lea sa usuia i Miami, Amerika mai le aso 10 – 13 o Mati 2008.

O lenesi faaliga sa maua ai le avanoa e atili maketi ai Samoa mo faigamalaga o vaa ma meli lau pasese. O lenesi atinae ua mautinoa le tele o alamanuia ua faamanuiaina ai le atunuu, e ala lea i tupe maua a le Pulega a Uafu, o Kamupani Vaa, o Kamupani o loo gafa ma le faatafafaoina o tagata malaga maimoa mai, faapea ma faleoloa o loo faatauina le tele o oloa taulima Samoa. O le 2008 ua faamautu mai ai le afea o Samoa o meli e 22 ma o loo i ai le naunautai ina ia sili atu mo le 2009.

Feiloaiga ma le Kamupani Vaalele Air New Zealand: Ina ua uma ai o faaliga i Miami, sa malaga le faigamalaga e feiloai ma le Kamupani Vaalele o le Air New Zealand i Los Angeles.

O lenesi feiloaiga sa talanoa ai avanoa e ona galulue faatasi ai le Pulega ma le Kamupani Vaalele i itu tau faalauiloa ae faapea foi ma le sailia o fuafuaga a le Kamupani mo ana auaunaga fai i le isi vaitaimi faaletausaga o loo loma nei.

O isi o mataupu sa talanoaina o le siitia lea o numera o malaga a le Kamupani Vaalele i Samoa, o malaga mai Amerika mai Aukilani. I le taimi nei, e ono 6 faigamalaga a le Air New Zealand i le vaiaso, ma o le faammoemoe o lea talanoaga ina ia siitia atu lea numera i le 11.

I le faafaigofie ai o ia faigamalaga, ua amata nei ona tuuina mai le Kamupani Vaalele se ituaiga vaalele fou o le 763, e suia ai le 767, ona o fuafuaga ina ia talafeagai le vaalele mo le vaaiiga lelei o tagata faimalaga mai.

Ua i ai foi le faamoemoe o le Kamupani Vaalele e faatino se polokalame e ta'ua o le Air New Zealand University, e faamalosi ai le faauauaina o le silafia e tamalii o loo faia le galuega o le faatauina o faigamalaga mai. O loo i ai foi se polokalame tuu faatasia a le

Kamupani e faalauiloa ai atunuu ua filifilia e i ai Samoa, Cook Islands ma Niu Sila i tulaga faa Road Show poo aoao tuu faasolo i le itulagi i sisifo o le atu-Amerika.

E tele le fesoasoani a le Kamupani Vaalele i lea tulaga i pasese pau mo faigamalaga, faapea foi ma fesoasoani i le felauaiga o metotia ma pepa faalauiloa.

Feiloaiga ma le Konesula a Samoa i Kalefonia: I talanoaga a le faigamalaga ma le Konesula a Samoa i Kalefonia, le Susuga Tuitogamotoe Theresa Rotter, na maua ai le tele o faamatalaga, faapea ma auala fesoasoani e ona faatino ai ni polokalame e atili faalauiloa ai Samoa i Amerika, ma o le a faatino lea faamoemoe i le lumanai i sona tulaga faafoe lelei.

4. Lipoti Fono I Niu Ioka.

Ua faamaonia e le Kapeneta le lipoti o le Fono Iona 52 a le Komisi o le Tulaga o Tina ma Tamaitai, lea sa faia i Niu Ioka, aso 25 Fepuari 2008 – 7 Mati 2008.

O lenei fono sa faamamafa ai le iloiloaina o tulaga o loo i ai le faatupeina ma le faaoloaina o fuafuaga a Malo taitasi, ina ia maua uma e alii ma tamaita'i, teine ma tama faamanuiga e auala mai i atina'e, polokalame ma fuafuaga uma o loo faatino i totonu o Malo o le lalolagi.

O atunuu o le Pasefika sa auai e aofia ai Samoa, Fiti, Papua Niu Kini, Toga, Kiripati, Tuvalu, Atu Kuki ma le Atu Solomona.

O le usugafono a Samoa sa auai atu i ai le Minisita o Tina ma Tamaita'i, le Afioga Fiamme Naomi Mataafa, le Ofisa Sili o Pulega, le Susuga Luagalau Foisaga Eteuati Shon, faatasi ai ma le Pule Lagolago o le Vaega o Tina ma Tamaita'i.

5. Poloaiga Faaletulafono mo Oloa Faasa ona Faaulufale mai i Samoa.

Ua faamaonia e le Kapeneta le Poloaiga Faale-Tulafono mo oloa Faasa ona Faaulufale mai i Samoa mo le taofia o le faaulufale mai i Samoa o taavale tauagavale foepuni i ona aiaiga ua i le Poloaiga Faaletulafono.

I le mae'a ai o tauaofiaga a le Palemene i le vaiaso na se'i mavae nei, na pasia ai le Tulafono o Suiga Tau Fela'uaiga i Luga o Auala 2008. Ua mae'a foi ona saunia ma faamaonia e le Loia Sili a le Malo le Ata o le Faasilasilaga Faapoloaiga Faale-Tulafono e tusa ai ma le Vaega 49 o le Tulafono o Titute 1977.

O lenei Tulafono o le a faalēaogaina ai foi ma le Faasilasilaga o le Aso 18 Ianuari 2008 ma suia ai le 8 tausaga i le 12 tausaga le matua o taavale tauamatau foepuni e mafai ona faaulufale mai i totonu o Samoa.

O lenei tulafono o le a faamalumuina i se aso e faasilasila faalauaitete ai lenei Poloaiiga Faaletulafono.

6. Malaga a le Minisita o le Soifua Maloloina.

Ua faamaonia e le Kapeneta le Malaga atu o le Minisita o le Soifua Maloloina, Afioga Gatoloaifaana amataga Alesana Gidlow, i le Fono Lona 61 a le Faalapotopotoga o le Soifua Maloloina o le Lalolagi e usua i Geneva Switzerland mai le aso 18 – 27 Me 2008.

O lenei fono e usua faaletausaga, ma e tatau lava ona malaga ai le Minisita ma le Ofisa Sili o Pulega o le Matagaluega o le Soifua Maloloina i nei Fono Faavaomalo aua le soalaupuleina o mataupu taua faalesoifua maloloina i le lalolagi a e faapea foi ona faatonutonu ai taiala mo le Soifua Maloloina i Samoa

O le a malaga faatasi le Afioga i le Minisita, ma le Ofisa Sili o Pulega o le Soifua Maloloina, le Susuga Palanitina Tupuimatagi Toelupe, ma le Susuga a Pelenatete Stowers.

Filifilia o le Ofisa Sili o Pulega o le Soifua Maloloina ma sui o le Komiti o le WHA:
Ua avea nei le Ofisa Sili o Pulega o le Soifua Maloloina, le Susuga Palanitina Tupuimatagi Toelupe, ma sui o le Komiti a le WHA ua ta'ua o le “WHO Staff Pension Committee”, o ia foi o se Sui o le Western Pacific Regional Office.

E pei ona tuuina mai, ua valaaulia mai e le WPRO, le Susuga Palanitina Tupuimatagi Toelupe e avea ma sui i le Komiti a le WHO staff Pension ma o le'ā amataina i le Fono tele lea a le WHA le tauaveina o ona tiute faaopopo mo le isi 3 tausaga.

Government Press Release.